

UPM anjur seminar bincang isu keterjaminan makanan

Serdang: Institut Pengajian Sains Sosial (IPSAS), Universiti Putra Malaysia (UPM) baru-baru ini menganjurkan Seminar Serantau Isu Komuniti Siri Kelima (SSIK) 2024 bagi membincangkan isu pembangunan komuniti dan keterjaminan makanan.

Majlis penutup SSIK 2024 yang disempurnakan Timbalan Menteri Pengajian Tinggi, Datuk Mustapha Sakmud itu turut menyaksikan pertukaran dokumen Memorandum Persefahaman antara UPM dan Universitas Halu Oleo, Indonesia (UHO).

Naib Canselor UPM, Datuk Prof Dr Ahmad Farhan Mohd Sadullah berkata, seminar itu menjadi platform bagi mengeratkan kerjasama dalam menjalankan kajian serta jaringan di peringkat nasional dan antarabangsa berkaitan aspek pembangunan komuniti.

"Kita memerlukan pendekatan yang kolaboratif untuk memperkasakan komuniti dalam isu keterjaminan makanan dan juga penyelesaian yang mendalam supaya ia mampu merealisasikan hasrat menjayakan agenda sekuriti makanan negara," katanya.

Sementara itu, Pengarah IPSAS, Prof Dr Haslinda Abdullah berkata pada siri ini pihaknya mendapat kerjasama dari UHO; Universitas Teuku Umar; Universitas Abulyatama Indonesia dan Walailak University, Thailand.

"Penganjuran seminar ini dilihat sejajar dengan keadaan isu keterjaminan makanan yang menjadi kebimbangan di peringkat nasional dan global serta peserta secara langsung dapat bertukar pandangan untuk menjadikan sektor pertanian lebih cekap," katanya.



Mustapha dan Dr Ahmad Farhan semasa di Seminar Serantau Isu Komuniti Siri Kelima (SSIK) 2024 baru-baru ini.

(Foto Noor Azreen Awang/BH)